

ತಿಮೋಥೆಯನಿಗೆ ಬರೆದ ಮೊದಲನೆಯ ಪತ್ರಿಕೆ ಪೌಲನೆ ತಿಮೋಥೆನ ಲೀಖ್ಯೋತೆ ಪಹಿಲಿ ಚಿಟ್ಟಿ ಮಾಲುಮ್ ಕರಾನು

ಅಪೊಸ್ತಲ ಹುಯಿರೋತೆ ಪೌಲ ಇನೊ ಶಿಷ್ಯ ಹುಯಿರೋತೆ ತಿಮೋಥೆನ ಲೀಖ್ಯೋತೆ ಚಿಟ್ಟಿ ಹುಯಿರ್ದೆಸ್. ಯೇಸು ಕ್ರಿಸ್ತ ಪೈದಹುಯೊ ತದೆ ಖ್ವುಮಾರ್ ಬೇಲುಪ್ಪರ್ ಖ್ವಡ್ತೀನಿಖ್ತ್ ಧೂ ಚಾರ್ ಉಪ್ಪರ್ ಖ್ವಡ್ತೀನಿಖ್ತ್ ವರಖ್ವನಿ ಬಾದ್ಮ ಆ ಚಿಟ್ಟಿ ಲೀಖ್ಯೆರ್ದ್ ಉಶೆ. ಅನ ಪೌಲನೆ ಜಿವ್ವಾನ ಖರ್ತಿನ ದನ್ತ ಲೀಖಿರಾಖ್ಯೊಸ್. ಪೌಲ ಅಜ್ಜು ತಿಮೋಥೆಮ ಆಲ್ಪಿ ಸಂಬಂಧ ಥೀ. ಪೌಲ ತಿಮೋಥೆನ ಛಿಯೊಕರಿ ಬೋಲ್ತೊಡೊ. ಫಿಲಿಪ್ಪಿ 2:22, 1 ತಿಮೊ 1:2—1:18.

ಹೈರುತೆ ಚಾರ್‌ಮ ಏಕ್ ಚಿಟ್ಟಿ ಹುಯಿರ್ದೆಸ್. ಪೌಲನೆ ಸಬೆನ ಲೀಖ್ಯೊಕೊಂತೆ ಏಕ್ ಅದ್ಮಿನ ಲೀಖಿರಾಖ್ಯೊಸ್. ಅಲಕ್ ತೀನ್ ಚಿಟ್ಟಿಯೇ ಖಿವು ಕತೊ: 2 ತಿಮೋಥೆ, ತೀತ, ಅಜ್ಜು ಫಿಲೆಮೋನ, ಸಬೇನಿ ಅರಾದನೆನಿ ಬಾರೇಮ ಪಹಿಲಿ ತಿಮೋಥೆಮ ಕೈಏಕ್ ಖ್ವುಜ್ಞ್ ಥಾ. 2:1-15 ಸಬೇನು ಘಲ್ಡಾವ್ನಿ ಲ್ಹಾಯೇಕ್‌ಬಿ 3:1-13 ಅಜ್ಜು ಝೂಟಿ ಬೋಧಕರ್ದಿ ವಿರೋದ್ ಝೇತಾವ್ಣಿ 1:3-11, 4:1-5, 6:2-5 ಆ ಅಖ್ವಾನ ಪೌಲನೆ ಖಿವಿ ಪರಕ್ತ ಸಬೆನ ಬೀಚ್ಚ ತಿಮೋಥೆಯನ ಏಕ್ ಯಜಮಾನ್ ಕರೀನ್ ಕಿಮ್ ಉರಾಡ್ನು ಕರಿ ಶಿಕಾಡಸ್. ಪಹಿಲಿ ತಿಮೋಥೆನು ಚಿಟ್ಟೇಮ ಕೆತ್ತೇಕ್ಕಿ ನಿಯಮ್ ಥಾ. ಆ ವೇಳ್ತ ಆಗೆ ಪೀಛಿನಿ ಸಬೆನ ಗಲ್‌ಥಾವ್ನ್ ಹಮ್ಮೆನ ಹಗಾಮ್ ರ್ಹೇಸ್ತೆ ಸಬೇನಿ ಸೇವೆ ಕಿಮ್ ಕರೆಜಾಯ್ ಕರಿ ಖ್ವುಮ್‌ಜೆಜಾಯ್.

ಕಾಡಿದೇಖೊ

1. ಪೌಲ ತಿಮೋಥೆಯನ ಧನ್ಯವಾದ್ ಕರ್ತೊಹುಯಿನ್ ಶುರುಕರಿರಾಖ್ಯೊಸ್. 1:1-2

2. ತಿಮೋಥೆಯನ ಝೂಟಿ ಬೋಧನೆ ಕರವಾಳನಿ ಬಾರೇಮ ರ್ಝೇತಾವ್ವಿ 1:3-11
3. ಪೌಲನೆ ಯೇಸುಕ್ರಿಸ್ತನ ಕಿಮ್ ಧನ್ಯವಾದ್ ಕರ್ತೋಥೊ ಕರಿ ಬೋಲ್ತೊಹುಯಿನ್ ಚಿಟ್ಟಿನ ಶುರುಕರಸ್.1:12-19
4. ಇನಕೇಡೆಥು ಆರಾದನೆ ಅಜ್ಜು ಸಬೆನ ಘಲ್ದಾನಿ ಬಾರೇಮ ತಿಮೋಥೆಯನ ಖ್ವೊಜ್ ದೇಸ್.2:1—3:16
5. ತಿಮೋಥೆಯನ ಪೌಲನೆ ಖ್ವೊರ್ತಿನಿ ಖ್ವೊಜ್ ದೇತೊಹುಯಿನ್ ಆ ಚಿಟ್ಟಿನ ಖ್ವೊತಮ್ ಕರಿರಾಖ್ಯೋಸ್.4:1—6:21

¹ ಕ್ರಿಸ್ತ ಯೇಸುನೊ ಅಪೊಸ್ತಲ ಹುಯಿರ್ದೊತ್ತೆ ಪೌಲನೆ, ತಿಮೋಥೆನ ಲೀಖ್ಯೋತೆ, ಅಪ್ಪ ಬಚ್ಚಾಡವಾಳೊ ದೇವ್‌ಬಿ ಅಪ್ಪಿ ಭರೋಖ್ವಾನ ಆಧಾರ್ ಹುಯಿರ್ದೊತ್ತೆ ಕ್ರಿಸ್ತ ಯೇಸುನಿ ಹುಕುಮ್ಮಿಮತ್ ಮೇ ಅಪೊಸ್ತಲ ಹುಯೊ.

² ವಿಶ್ವಾಸ್‌ಮ ಮಾರೊ ಖ್ವೊಚೊ ಛಿಯ್ಯಾನಿಘೋಣಿ ಹುಯಿರ್ದೊತ್ತೆ ತಿಮೋಥೆನ, ಬಾ ದೇವ್‌ಥಿ ಅಜ್ಜು ಅಪ್ಪೊ ಪ್ರಭು ಹುಯಿರ್ದೊತ್ತೆ ಕ್ರಿಸ್ತ ಯೇಸುಥಿ, ವಾರ್‌ಖ್ವೊಗೋರ್ ಅಜ್ಜು ಶಾಂತಿಬಿ ಮಳಾದೆ.

ಝೂಟಿ ಬೋಧನೆನಿ ಬಾರೇಮ ರ್ಝೇತಾವ್ವಿ

³ ಮೇ ಮೆಕೆದೋನ್ಯನ ಜ್ಞಾವಾನಿ ವಖ್ವೊತಮ್, ತೊ ಎಫೆಸಮಸ್ ರ್ದೆಕರಿ ಗಿಂಗೈಲಿದೊ, ಹಿಜ್ಜಾ ಥೋಡು ಭಣು ಝೂಟಿ ಭೋತಿ ಬೋಲಿದೆವ್‌ಕರ್ತುಥೊತೆ ಇವ್ವುನ ಹುಕುಮ್ ದೀನ್ ಭೀರಾಕ್‌ಣು ಕರೀಬಿ,

⁴ ಕೊಂತೆ ಖೇಣಿನಾಬಿ, ಅಜ್ಜು ಆಗೆಪೀಛಿಕೊಂತೆ ಖಾನ್‌ದಾನೇನಿ ಬಾರೇಮಬಿ ಬೋಲಾನು ಮ್ಹೆಲಿದೇವೊ. ಯೋ ಹುವಾನುಕೊಂತೆ ವಾದ ವಿವಾದ್ ಉರಾಡುಕರಸ್ ಪಣ್ಣೆ ಅಪ್ಪೆ ದೇವ್ನಿ ಖ್ವೊಜ್‌ನಿತರ ಕರುಕರೈಕೊಯ್ನಿ ಯೋ ವಿಶ್ವಾಸ್‌ಥಿ ಖಲಿ ಹುವಾನು ಹುಯಿರ್ದೊಸ್.

⁵ ಪಾಕ್ ದಿಲ್, ಅಛ್ಲಿ ಖ್ವೊಯಾಲ್, ಶುದ್ಧಮನ್‌ಥೀಬಿ ವಿಶ್ವಾಸ್‌ಥಿ ಪೈದಹುಯುತೆ ಪ್ಯಾರ್ ದೇವ್ನಿ ಹುಕುಮ್‌ನಿ ಶುಶತ್ ಹುಯಿರ್ದೊಸ್.

6 ಧೋಡು ಜಞು ಆ ಮಾರಗ್‌ನ ಮ್ಹಂದಿನ್ ಕಾಮ್‌ಕೊಂತೆ ಬುದ್ದಿನ ವಿವಾದ್ತು ಖ್ವಪ್ಪಿ ಪಡಿರ್ಪ್ಪ್.

7 ಇವ್ಣೆ ದೇವ್ವಿ ನಿಯಮ್ಮ ಶಿಕಾಡವಾಳು ಹುಯಿರ್ದೇಣು ಕರಿ ಆಖ್ತ್ ಕರಾಸ್. ಕತೋಬಿ, ಇವ್ಣೆ ಇವ್ಣಿ ಶೊಂತ್ ವಾತೇನ ಪರ್ವಿಲೇಯಿಕೊಯ್ವಿ. ನತರ್ ಖೆವಿ ಬಾರೇಮಾಬಿ ಇವ್ಣೆ ಆತ್ಮ ವಿಶ್ವಾಸ್‌ಧಿ ಬೋಲಸ್ವಿ ಇನ ಇವ್ಣೆ ವಿಶ್ವಾಸ್ ಕರಾಕೊಯ್ವಿ.

8 ನಿಯಮ್ಮ ಉಪಯೋಗ್ ಕರ್ನುತೆ ತರೀಖಾಮ ಚಾಲಿಲಿದೋತೊ, ಯೋ ಅಲ್ಪಾನ್ ಖ್ವಾಜೆಸ್ ಕರ್ಪ್ಪ.

9 ಆ ಖ್ವಯಾಲ್ಮ ರಾಕ್ಟು ಕದೇಕದೇಬಿ ನಿಯಮ್ ನೀತಿವಾಳನಖ್ವಾಜೆ ಬಣಿರ್ಪ್ಪಕೊಯ್ವಿ. ಕತೋಬಿ ನಿಯಮ್ಮ ಪಾಲನ್‌ಕರಕೊಂತೆ ರ್ವವಾಳು, ಅಪರಾದಿ ಹುಯಿರ್ದವಾಳು, ಭಕ್ತಿಕೊಂತೆ ಇವ್ಣೆ ಪಾಪಿಖ್ವಾರಾನ, ಅಜ್ಜು ಪರಿಶುದ್‌ಕೊಂತೆಬಿ, ಆತ್ಮಿಕಕೊಂತೆ ರ್ವವಾಳನ, ಇವ್ಣೆ ಆಯ ಬಾನ ಮಾರಿನಾಖಸ್ತೆ ಇವ್ಣುನ, ಅಜ್ಜು ಖೊನಿನ,

10 ಅನೀತಿವಾಳು, ಸಲಿಂಗ್ ವ್ಯಬಿಚಾರ್ ಕರವಾಳು, ಚೋರ್‌ಚ್‌ಖಾಟ್ ಕರಾವಾಳು, ಝೂಟಿಸಾಕ್ಷಿ ಬೋಲವಾಳು, ಕೋಣ್ ಅಲ್ಪಿ ಉಪದೇಶ್‌ನ ವಿರೋದ್ ಹುಯಿರ್ದಸ್ವಿ ಇವ್ಣೆ ಖ್ವಾಜೆ ಹುಯಿರುಸ್.

11 ಆ ಸುವಾರ್ತೆ ಯೋಗ್ಯಹುಯಿರೊತೆ ದೇವ್ವಿ ಮಹಿಮೆನ ದೇಖಾವನಿ ಸುವಾರ್ತೆನಿಮತ್ ಛಾ. ಆ ಸುವಾರ್ತೆನಿ ಸೇವೆ ಮನ ದೇವ್ವೆರ್ಪ್ಪ್.

ದೇವ್ವಿ ದಯಾನಖ್ವಾಜೆ ಧನ್ಯವಾದ್

12 ಮೆ ಮಾರೊ ಪ್ರಭು ಕ್ರಿಸ್ತಯೇಸುನ ಧನ್ಯವಾದ್ ಕರುಸ್. ಯೋ ಮಾರ ಆಖ್ವಾಸ್ ಕಾಮ್ ಶಕತ್ ದೀಮ್ವೇಲ್ಯೊಸ್ ಇನ ಮೇ ಧನ್ಯವಾದ್ ಕರುಸ್. ಶನಖ್ವಾಜೆ ಕತೊ ಯೊ ಮನ ವಿಶ್ವಾಸ್‌ವಾಳೊ ಕರಿ ಮಾಲುಮ್ ಕರಿಲಿನ್, ಇನ ಸೇವೆನಖ್ವಾಜೆ ಚೂಣಿರಾಖ್ಲೊಸ್.

13 ಅಗಾಡಿ ಮೇ ಕ್ರಿಸ್ತನಿ ವಿರೋದ್ ವಾತೆ ಬೋಲಿನ್, ಇನ ಖ್ವಿತ್ತೆರಾಖ್ಲೊಸ್ ಅಜ್ಜು ಇನಿ ಖ್ವರ್ಮೆಬಿ ಕಾಡಿರಾಖ್ಲೊಸ್. ಶನಕತೊ, ಮೇ ತದೆ ಅವಿಶ್ವಾಸ್‌ಮ ಧೊ, ಇನಖ್ವಾಜೆ ಮೇ ಶಾತ್ ಕರುಕರೊಸ್ ಕರಿ

ಮನ ಮಾಲುಮ್ ಕೋ ಥೂನಿ. ತೋಬಿ ದೇವ್ವೆ ಮಾರಪರ್ ಗೋರ್ ಕರಿರಾಖ್ಯೋಸ್.

14 ಪ್ರಭುನೆ ಇನಿ ಕೃಪೆನ ಕೆತ್ತೇಕ್ಕಿ ಭಾಖ್ತ್ ಮಾರಪರ್ ರಂಚ್ಯೊ ಇನಿ ವಿಶ್ವಾಸ್ ಅಜು ಪ್ಯಾರನ ದಿದೊ. ಯೋ ಅಪ್ಪೊ ಯೇಸುಕ್ರಿಸ್ತನ ಮಳಿರ್ದವಾಮ ಲ್ಲಾ.

15 ಕ್ರಿಸ್ತ ಯೇಸು ಪಾಪಿ ಖ್ವಾರಾನ ಬಚ್ಚಾಡನಖ್ವಾಜೆ ಆ ಜಗತ್‌ಮ ಆಯೊ ಕರಿ ಬೋಲಾನಿ ವಾತೆ ಖ್ವಾಚಿ ಹುಯಿರ್ದಿಸ್, ಆ ವಿಶ್ವಾಸ್ ಕರಾಖ್ತುಕುಬಿ ಸ್ವಿಕಾರ್‌ಕರಾನ ಲ್ಹಾಯೇಕ್ಕುಬಿ ಹುಯಿರ್ದಿಸ್. ಶನಕತೊ ಇವ್ನ್ ಪಾಪಿಮ ಮೇಸ್ ಪಹಿಲೊ.

16 ಕತೋಬಿ ಅನ ಅಗ್ಗಲ್ ಹರ್‌ಹಮೇಶಾನಿ ಚಿಂಧಾಗಿನಖ್ವಾಜೆ ಇನಪರ್ ವಿಶ್ವಾಸ್‌ಕರವಾಳನ ಮಾಲುಮ್‌ಪಡಾದೆಕರಿ ಕ್ರಿಸ್ತ ಯೇಸು ಪಾಪಿಮ ಮುಖ್ಯಥೋತೆ ಮನ ಗೋರ್‌ಕರಿನ್, ಇನಿ ಪೂರ ಸಮಾಧಾನ್‌ಥಿ ದೇಖಿಲಿದೊ.

17 ಅಖ್ವ ಜಮಾನಾನೊ ರಾಜಬಿ, ಕದೇಬಿ ರ್ದವಾಳೊಬಿ ದೆಖಾವಕೊಂತೆ ಹುಯಿರೋತೆ ಎಕ್ಕ್‌ಸ್ ದೇವ್ವ ಇಜ್ಜತ್‌ಬಿ ಮಹಿಮೆಬಿ ಜಗ್‌ಜಮಾನಮಾಬಿ ರ್ದವಾದೆ. ಆಮೆನ್.

18 ತಿಮೊಥೆ, ಮಾರ ಥಿಯ್ಯಾ ಮೇ ತುನ ಹುಕುಮ್ ದೆವ್‌ಕರೂಸ್ ವಚನ್ನಿಘೋಣಿ ಪಹಿಲೇಥುಸ್ ತಾರಿ ಬಾರೇಮ ಪ್ರವಾದನೆ ಹುಯಿರುಸ್. ಯೋ ಅವಾಜ್‌ನ ತಾರಿ ಕಫನ್ ಬಣ್ಣೆಲೆ, ಅನೇಥಿ ತೂ ಮೋಟಿ ಜಂಗ್ ಭೀಡಾನಿತರ ಹುವಾದೆ.

19 ತಾರಿ ವಿಶ್ವಾಸ್‌ನಾಬಿ ಅಲ್ಫಿ ದಿಲ್ಲಿ ಸಾಕ್ಷಿನಾಬಿ ಘಟ್‌ಥಿ ಧರಿರಾಕ್. ಥೋಡುಜಣು ಇವ್ಣಿ ಮನ್ನಿ ಅಲ್ಫಿಸಾಕ್ಷಿನಿ ವಿಶ್ವಾಸ್ ನಾಶ್‌ಕರಿನಾಖ್ಯ.

20 ಹುಮೆನಾಯಬಿ ಅಲೆಕ್ಸಾಂಡರ್‌ನಿ ಅಮ್ಮಸ್ ಕರ್ದಾಥ. ಅವ್ಣೆದೇವ್ವ ವಿರೋದ್ ನಾ ಬೋಲ್ತುತೆ ಬರೋಬರ್‌ನಿ ಅಕ್ಕ್‌ಲ್ ಶಿಕಾದೆಕರಿ ಮೇ ಇವ್ಣುನ ಶೈತಾನ್ ಹಾತ್‌ಮ ಒಪ್‌ಶೈದಿದೊ.

ಸಬೇನಿ ಆರಾದನೆ

1 ಖ್ವಾರೇಥಿ ಪಹಿಲೆ, ತಮಾಮ್ ಅದ್ವಿನಖ್ವಾಜೆ ಬಿಂತಿ ಅಜ್ಜು ಪ್ರಾರ್ಥನೆ ಕರೊ. ಅಖ್ವಾ ಅದ್ವಿವ್‌ನಖ್ವಾಜೆ ದೇವ್‌ಕನ ಅವಾಗ್‌ಮಾಂಡೊ* ಅಜ್ಜು ದೇವ್‌ ಧನ್ಯವಾದ್ ಕರೊಕರಿ ತುಮೂನ ಬೋಲಿಲೆವುಸ್.

2 ರಾಭಾವ್‌ನಟೇಕೆ, ಖ್ವಾರ ಅದಿಕಾರಿನಟೇಕೆ ಧನ್ಯವಾದ್. ಅನೇಥಿ ಅಪ್ಲೆ ಸಮಾಧಾನ್ ಶಾಂತಿನ ದೇವ್‌ ಭರ್‌ಪೂರ್ ಮರ್ಯಾದಿ ದೇತಹುಯಿನ್ ಅಭಿಜೀವನ್ ಚಲಾವನಖ್ವಾಜೆ,

3 ಆ ಹೈರುತೆ ಅಫ್ಫು ಅಜ್ಜು ಅಪ್ಲೊ ರಕ್ಷಕ್ ಹುಯಿರೋತೆ ದೇವ್‌ ಪಸಂದ್‌ನು ಹುಯಿರುಸ್.

4 ಯೊ ತಮಾಮ್ ಅದ್ವಿರಕ್ಷಣೆಲೀನ್ ಅಜ್ಜು ಖ್ವಾಜಿನ ಪರಖ್‌ಣು ಕರಿ ಬೋಲಾನುಸ್ ಇನಿ ಆಖ್ವ್.

5 ಶನಕತೊ ಎಕ್ಕ್‌ಸ್ ದೇವ್‌ ಅಜ್ಜು ದೇವ್‌ನಬಿ ಅದ್ವಿನ ಮಳಾವವಾಳೊ ಎಕ್ಕ್‌ಸ್ ಜಣೊ, ಯೋ ಕೋಣ್‌ಕತೊ ಅದ್ವಿ ಹುಯಿರೊತ್ತೆ ಕ್ರಿಸ್ತ ಯೇಸುಸ್.

6 ಇನೆ ಹರೇಕ್ ಜಗ್‌ಭಾತ್ನ ಅದ್ವಿನ ಬಚಾಡಾನಖ್ವಾಜೆ ಲೋಡಾವನಟೇಕೆ ಇನ ಯೋಸ್ ಒಪ್‌ಶೈದಿದೊ. ಯೋ ಹರೇಕ್ ಅದ್ವಿನ ಬಚಾಡನ ಹರ್ವಾಸ್. ಆಸ್ ಬರೋಬರ್‌ನಿ ವಖ್ವತ್‌ಮ ಬೋಲ್ವತೆ ಸಬೂತ್ ಹುಯಿರುಸ್.

7 ಅಜ್ಜು ಅನಖ್ವಾಜೆಸ್ ಮನ ಶಿಕಾಡವಾಳೊ ಅಜ್ಜು ಅಪೊಸ್ತಲ ಕರೀನ್, ವಿಶ್ವಾಸ್‌ಥಿಬಿ ಖ್ವಾಚಿಥಿಬಿ ಯೆಹೂದ್ಯರ್‌ಕಾಹೆತೆ ಅದ್ವಿನ ಭೋದನೆಕರಾನ ಮನ ನೇಮಕ್ ಕರ್ಯ್ ಮೇ ಝೂಟಿ ಕೊಬೋಲುಕರುನಿ ಖ್ವಾಚಸ್ ಬೋಲುಕರುಸ್.

8 ಅನಖ್ವಾಜೆ ಅಖ್ವಿ ಝುಗೋಮ ಪಖ್ಲೊ ಖ್ವಾರು ಇರಾದೊಕೊಂತೆ, ಆಡ್‌ಫೇಡ್ ಬೋಲ್ವನಾತೆ, ಹಾತ್ನ ಪಾಡಿನ್ ದೇವ್‌ಥಿ ಸಮರ್ಪಣ್ ಹುಯಿನ್ ಪ್ರಾರ್ಥನೆ ಕರ್ಯ್‌ಕರಿನ್ ಮಾರಿ ಆಖ್ವ್ ಹುಯಿರ್ದೆಸ್.

9 ಅಮ್ನಸ್ ತಯೇಡಾಬಿ ಮರ್ಯಾದಿಥಿಬಿ ಅಜ್ಜು ಗ್ರಿಸ್ತಿಥಿರ್ದೆನ್

* 2:1 2:1 ಖ್ವಾಜೆನಖ್ವಾಜೆ ಖಲಿಕಾಹೆ ಬಿಜಾವ್ ಖ್ವಾಜೆ ಪ್ರಾರ್ಥನೆ ಕರಾನು ಕರಿ ಮತ್‌ಲಬ್.

ಇಜ್ಜತ್‌ನ ಮಾನಿಜಾವನು ಲುಂಗ್ಡಾನ ಫೇರನ್ನಕರಿ ಆಖ್ವ್‌ಕರುಸ್. ಇವ್ವೆ ಘಣಿಧರಾಧಿ ಕೇಖ್ವ್‌ನು ಶನ್‌ಗಾರ್, ಖ್ವೊನ್ನುಖ್ವರಪ್‌ಧಿ ಶನ್‌ಗಾರ್, ಲುಂಗ್ಡಚಿತ್ರಾಧಿಸ್ ಶನ್‌ಗಾರ್ ನಾಕರಿಲೇವ್ವತ್ತೆ,

10 ದೇವ್ವಿವಿಶ್ವಾಸಿ ತಯೇಡಾನ ರ್ವೇವ್ವತ್ತೆ ಚಾಲ್‌ಚಲಣ್ಣ ಅಲ್ಲಾಕಾಮ್‌ಧಿ ಶನ್‌ಗಾರ್ ಕರಿಲೇವ್ವತ್ತೆ.

11 ಅಜ್ಜು ತಯೇಡ ಶಪೋಧಿಬಿ ಅಚ್ಚಾನ್‌ಧಿಬಿ ಭೊದನೇನ ಶಿಕಾವಳಿ ಹುಯಿರ್ವ್ವೇಣು.

12 ಮೇ ಪರ್ವಾಪ್‌ನ ಬೋಲಿದ್ಯವಾನು ರ್ವವೊ, ಇವ್ವಪರ್ ಹಕ್‌ಚಲಾವನು ರ್ವವೊ ತಯೇಡಾನ ಮ್ವೇಲುಕೊಯ್ವಿ. ಇವ್ವೆ ಖ್ವೊಪೇಧಿ ರ್ವೇಣು.

13 ಪಹಿಲೆ ಬಣ್ವೊತೆ ಆದಾಮ್, ಇನಪಾರ್ ಹವ್ವ ಬಣೀತೆ.

14 ಅಜ್ಜು ಧೋಕ ಹುಯುತೆ ಆದಾಮ್ ಕಾಹೆ; ತಯೇಡ ಧೋಕ ಹುಯಿ, ಅಜ್ಜು ಯೋ ದೇವ್ವಿ ನಿಯಮ್ಮ ತೋಡಿನ್ ಪಾಪಿ ಹುಯಿ.

15 ತೋಬಿ ತಯೇಡ ವಿಶ್ವಾಸ್‌ಮ, ಪ್ಯಾರ್‌ಮ, ಪವಿತ್ರಾಧಿ ರ್ವವಾಮ ಅಜ್ಜು ಧೋಬೆಡಿ † ರ್ವಯೀತೊ, ಲಡ್ಕಾ ಪೈದಹುವಾನಿ ವಖ್ವತ್‌ಮ ಬಚಿಜಾಶೆ.

3

ಸಬೇಮ ಗಲ್‌ಥಖ್ವಾರು

1 ಆ ಬೋಲಾನು ವಿಶ್ವಾಸ್‌ನು ಹುಯಿರುಸ್. ಏಕ್ ವಖ್ವತ್ ಅದ್ವಿನ ಅಲ್ವೊ ಘಲ್ವೊಹೊಣುಕತೊ ಯೋ ಅಲ್ವೊ ಕಾಮ್ ಕರಾನ ಹರಖ್ವ್ ಕರಾಸ್.

2 ಸಬೆನ ಚಲಾವವಾಳೊ ಗಲ್ವಿ ನಾಕರಾವಾಳೊ ಹುಯಿರ್ವ್ವೇಣು. ಇನು ಯೋ ದಾಬುಕ್ ರ್ವವಾಳೊ ಹುಯಿರ್ವ್ವೇಣು, ಆತ್ಮಾನ ಖ್ವಮಾಳಿಲ್ವವಾಳೊ, ಅಲ್ವಿ ಚಾಲ್ ಚಲಣ್‌ಧಿ ರ್ವವಾಳೊ, ಆವವಾಳಾನ ಸ್ವಾಗತ್‌ಕರವಾಳೊ, ಅಜ್ಜು ವಚನ್ ಶಿಕಾಡಾಮ ಚಾತುರ್ ಹುಯಿರ್ವ್ವೇಣು.

† 2:15 2:15 ಕತೊ ಖ್ವೊದ್‌ನ ದಾಬುಕ್ ರಾಖಾಮ ಬರಾಬರ್ ರ್ವಯೀತೊ ಕರಿ ಮತ್‌ಲಬ್.

3 ಯೋ ಪೀನ್ ಲಡೈ ಕರಾವಾಳೊ ನಾ ಹುಯಿರ್ದೇಣು, ನತರಾಕಿ ಮಾರ್ತೋಡ್ ಕರಾವಾಳೊಸ್ಕಿ ನಾ ಹುಯಿರ್ದೇಣು, ಕತೋಬಿ ಯೋ ಶೇದೇವ್‌ನಿಘೋಣಿ ಅಜ್ಜು ಸಮಾಧಾನ್‌ಥಿ ರ್ದೇಣು; ಇನ ಪೈಶಾನಿ ಲಾಲಚ್ ನಾ ರ್ದೇಣು.

4 ಯೋ ಇನ ಘರ್‌ವಾಳಾನ ಬರೊಬರ್‌ಥಿ ಚಲಾವವಾಳೊ ಅಜ್ಜು ಇನ ಲಡ್ಕಾ ಇನಿ ವಾತೇನ ಖ್ಹಮ್‌ಜಿನ್, ಮರ್ಯಾದಿ ದೈವಾನಿಘೋಣಿ ದೇಖಿಲೆವ್ವು.

5 ಶೊಂತ್ ಘರ್‌ವಾಳಾನಸ್ ಚಲಾವಾನ ಇನ ನಾ ಹುಯೂತೊ, ದೇವ್ನಿ ಸಬೆನ ಯೋ ಕಿಮ್ ಚಲಾವ್‌ಷೆ?

6 ಯೋ ನವೇಥಿ ದೇವ್ನಿ ನಂಬ್ಯಂತೆ ಅದ್ನಿ ನಾ ಹುಯಿರ್ದೇಣು, ನವೇಥಿ ನಂಬವಾಳಾನ ಸಬೆ ಚಲಾವಾನು ಕಾಮ್ ದಿದಾತೊ, ಇನಾಮ ಹಂಕಾರ್ ಐನ್, ಶೈತಾನ್ನ್ ಹುಯೂತೆ ಇಮ್ಮಿ ದಂಡನೆ ಇನಾಬಿ ಹುಯಿಜಾಶೆ.

7 ಎತ್ರೇಸ್ ಕಾಹೆತೆ, ಯೋ ಭಾರ್‌ಲ್ಯ ಅದ್ನಿಥಿ ಆಫ್ಲೊ ಕರಿ ಬೊಲೈಲ್ಯವಾಳೊ ಹುಯಿರ್ದೇಣು, ಇಮ್ ನಾ ರ್ದೇಯೋತೊ ಅದ್ನಿಖಾರ್ರು ಇನಾಪರ್ ಗಲತ್ ಲಗಾಡಿ ದಿಶೆ ಅಜ್ಜು ಯೋ ಶೈತಾನ್ನ್ ಚಪ್ಪಣ್‌ಮ ಖ್ಹಪ್‌ಡಿಜಾಶೆ.

ಸಬೆನ ಮದತ್ ಕರಾವಾಳು

8 ಇಮ್ಮಸ್ ಸಬೇಮ ಸೇವಕ್‌ರಾವಾಳೊಬಿ ಮರ್ಯಾದಿ ಲೀಲ್ಯಾವನ ಯೋಗ್ಯ ಹುಯಿರ್ದೇಣು. ಅಜ್ಜು ಇವ್ಣೆ ಬೇಜೀಬ್‌ವಾಳು. ಇವ್ಣೆ ಪಿಯಾವಾಳುಸ್ಕಿ ಅಜ್ಜು ಪೈಶಾನಿ ಲಾಲಚ್‌ಮ ನಾ ರ್ದೇಣು.

9 ವಿಶ್ವಾಸ್‌ನಿ ಗಧಾರ್ನ್ ಖ್ಹಾಚಿನ ಅಲ್ಫಿ ದಿಲ್ಲಿಸಾಕ್ಷಿನ ಧರಿದಾಖವಾಳ ಹುಯಿರ್ದೇಣು.

10 ಪಹಿಲೆ ಇವ್ಣುನ ತರೀಪ್‌ಶ ಕರಿಲೇವ್ಣು ಕೋಣ್‌ಬಿ ಇವ್ಣಾಪರ್ ಗಲತ್ ನಾಲಗಾಡ್ತೊ, ಇವ್ಣೆ ಸಬೇಮ ಸೇವಕ್ ಹುಯಿನ್ ಕಾಮ್ ಕರೆಜಾಯ್.

11 ಇಮ್ಮಸ್ ಇವ್ಣಿ ಬಾವಣ್‌ಬಿ ಫಾಲ್‌ಚಲಣ್‌ಮ ಅಲ್ಫಿ ರ್ಹಹವಾಳಿಯೆ ಹುಯಿರ್ದೇಣು ಅಜ್ಜು ಚಹಾಡ್ ಬೋಲವಾಳಿಯೆ ನಾ ಹುಯಿರ್ದೇಣು;

ಅಲ್ಲೇಥಿ ಚಾಲ್‌ವಾಳಿ ಹುಯಿರ್ದೇಣು ಅಜ್ಜು ಇವ್ವೆ ಹರೇಕ್‌ಮ ವಿಶ್ವಾಸ್‌ವಾಳಿಬಿ ಹುಯಿರ್ದೇಣು.

12 ಸಬೇಮ ಸೇವೆ ಕರಾವಾಳೊ ಏಕ್ ಬಾವಣ್‌ವಾಳೊ ಹುಯಿರ್ದೇಣು, ಇನ ಲಡ್ಕಾನ ಅಜ್ಜು ಘರ್‌ವಾಳಾನ ಬರೊಬರ್‌ಥಿ ಚಲಾವವಾಳೊ ಹುಯಿರ್ದೇಣು.

13 ಸಬೇಮ ಅಲ್ಫಿನಿತರ ಸೇವೆ ಕರಾವಾಳು ಸೇವಕರ್‌ನ ಘಣು ಮರ್ರಾದಿ ಮಳಾಸ್, ಅನೇಥಿ ಇವ್ವೆ ಕ್ರಿಸ್ತ ಯೇಸುಪರ್ ರಾಖಿಮ್ವೆಲಾನು ವಿಶ್ವಾಸ್‌ನ ಘಣು ಭಾಲಿಥಿ ಬೋಲವಾಳು ಹುಯಿರ್ದೇಣು.

ಮೋಟಿ ಗಪ್ಲತ್

14 ಮೇ ಭರೋಖ್ಲಾಥಿ ಆ ಚಿಟ್ಟಿ ಲೀಖುಕರುಸ್ ಒಗ್ಗಿಸ್‌ಮ ತಾರಕನ ಆವಾಳೊ ಛು.

15 ಕತೋಬಿ ಏಕ್‌ಬಾರ್ ಮನ ಆವಾನ ಧೇರ್ ಹುಯುತೋಬಿ, ಆ ಚಿಟ್ಟಿ ಮನ ಖ್ವಮ್‌ಜಾಡಸ್ತೆ ತಿಮ್ ದೇವ್ವ ಘರ್‌ಮ ಯೊ ಜಿವ್ವೊ ದೇವ್ವಿ ಸಬೆಮ ಚಾಲಿಲೇವ್ವತೆ ಪರಕ್ ಕಿಮ್‌ರ್ದೇಣು, ಯೋ ಸಬೆ ಖ್ವಾಚಿನು ಹದಿಪಾಯ ಅಜ್ಜು ಆಧಾರ್‌ನು ಖಂಬು ಹುಯಿರ್ದೇಣು.

16 ಅಪ್ಪ ದೇವ್‌ಮ ಭಕ್ತಿನು ಜಿವ್ವನು ಖ್ವಾಚಿ ಗಪ್ಲತ್ ಗುಮಾನಿಕೊಂತೆ ಘಣಿ ಮೋಟಿ ಹುಯಿರ್ದೇಣು, ಕ್ರಿಸ್ತನೆ ಅದ್ಮಿನಿ ರೂಪ್‌ಮ ಅಪ್ಪುನ ದೆಖಾಯೊ, ಯೋಸ್ ಪವಿತ್ರಾತ್ಮನ ವತಾಳ್ಯೊ ಸೊರ್ಗಾನ್ ದೂತರ್‌ಥಿ ದೆಖ್ವೊ. ಅಲ್ಹಾವ್‌ಅದ್ಮಿವೋನಿ ಬೀಚ್ಕ ಯೊ ಬೋಲಿವತಾಳ್ಯೊ, ಜಗತ್ ಇನಾಪರ್ ವಿಶ್ವಾಸ್ ಕರ್ರ್ವು ಅಜ್ಜು ಇನ ಮಹಿಮೆಥಿ ಸೊರ್ಗಾಮ ಪಡ್ವೊ.

4

ಝೂಟು ಭೋದಕರ್‌ಖ್ಲಾರು

1 ಕತೋಬಿ ಪವಿತ್ರಾತ್ಮ ಅಲ್ಫಿಂತರ ಬೋಲಾಸ್. ವಳ್ಕಾವಸ್ತೆ ದನೂಮ, ಥೋಡು ಅದ್ಮಿ ವಿಶ್ವಾಸ್‌ನ ಮ್ಹಂದಿಶೆ. ಅವ್ವೆ ರಗಾರು ಆತ್ಮನಿ ಹುಕುಮ್‌ನ ಪಾಲನ್ ಕರ್ಶೆ. ಅಜ್ಜು ಶೈತಾನ್ ಶಿಕಾಡಿದೇಸ್ತೆ ಪರಕ್ ಇವ್ವೆ ಚಾಲ್‌ಷೆ.

2 ಝೂಟಿ ಭೋದನೆ ಶಿಕಾಡವಳು, ಇವ್ವಿ ದಿಲ್ವಿಸಾಕ್ಷಿಪರ್ ದಾಗ್‌ನಾಖಿಲಿನ್.

3 ಇವ್ವೆ ವ್ಯಹಾ ಕರಾನು ಗಲತ್ ಕರೀಬಿ, ಖ್ವಣೇದ್ ಕರ್ಮ್‌ಹುಯು ರಾಲ್ತನ ನಾ ಖಾವ್ವುಕರಿ ಇವ್ವೆ ಶಿಕಾಡಸ್. ಕತೋಬಿ ವಿಶ್ವಾಸ್‌ಮ ರ್ವೇನ್, ಖ್ವಾಚಿನ ಪರ್ಖಿರಾಖ್ಯೂತೆ ಇವ್ವೆ ಧನ್ಯವಾದ್ ಕರೀನ್, ಯೋ ಖಾಣನ ಖಾವದೆ, ಶನಕತೊ ದೇವ್ವೆ ಖಾವಾನಟೀಕೆಸ್ ಯೋ ಖ್ವಾರು ಬಣೈರಾಖ್ಯೂಸ್ತೆ.

4 ಶನಕತೊ ದೇವ್ವೆ ಬಣೈರಾಖ್ಯೂಸ್ತೆ ಖ್ವಾರು ಅಲ್ಫ್ರಬ್ಸ್ ಹುಯಿರ್ದ್ವಾಸ್; ಕೆಹು ಖಿವು ಖಾದುತೋಬಿ, ದೇವ್ವೆ ಧನ್ಯವಾದ್ ಕರೀನ್ ಲೇವ್ವು.

5 ಶನಕತೊ ದೇವ್ವೆ ವಚನ್ ಬೋಲಿನ್, ಪ್ರಾರ್ಥನೆಕರಾಥಿ ಯೋ ಖಾಣು ಪಾಕ್ ಹುಯಿಜಾಸ್.

ಕ್ರಿಸ್ತ ಯೇಸುನೊ ಅಲ್ಫ್ರೊ ಸೇವಕ್

6 ಏಕ್ ವೇಳ್ ಹಿಜ್ಜಾನು ವಿಶ್ವಾಸಿ ಭೇನೆಬೈಯೇವನ್ ಬೋಲಿದೆವ್ವುಕತೊ ತೂ ಕ್ರಿಸ್ತಯೇಸುನೊ ಅಲ್ಫ್ರೊ ಸೇವಕ್ ಹುಯಿರ್ದ್ವೇಶ್. ಇನ ಪಾಳಿ ಪರ್ವೇಶಿ ಕರಾನು ವಿಶ್ವಾಸ್‌ಥಿ ಖ್ವಾಚಿ ಬೋಧನೆಥಿ ಹುವಾಸ್. ಇನ ತೂ ಲೀರಾಖ್ಯೂಸ್.

7 ಕತೋಬಿ ಅಜ್ಜ ಅಜ್ಜಿ ಬೋಲಾತೆ ಲೋಕ್‌ನಿ ಖೇಣಿಯೇಥಿ ತೂ ದೂರ್‌ರ್ದ್ವೇ. ಭಕ್ತಿಥಿ ರ್ದ್ವಾನ ಜಿವ್ವನ ಚಲಾವನಖ್ವಾಜಿ ತಾರು ತೂಸ್ ಶಿಕಿಲೆ.

8 ಶರೀರ್‌ನಿ ವ್ಯಾಯಮ್‌ಥಿ ತುನ ಥೋಡು ಫಾಯಿದೊ ಲ್ಹಾ, ಕತೋಬಿ ಭಕ್ತಿನು ಜಿವ್ವು ಹರೇಕ್ ಪರಕ್‌ಮಾಬಿ ತುನ ಫಾಯಿದೊ ಹುಯಿರುಸ್. ಶನಕತೊ, ಅನಾಮ ಹಮ್ಮೇನು ಹಗಾಮ್ ಅಜ್ಜು ಖ್ವಾಮ್ವೆ ಆವಾನ ಜಿಂದಗೀನಖ್ವಾಜಿ ದೆವೈರ್ದ್ವಾತೆ ವಾಗ್ದಾನ್ ಅನಾಮ ಮಳೀರ್ದ್ವಾಸ್.

9 ಆ ಬೋಲ್ಯೊತೆ ಖ್ವಾಚು ಹುಯಿರುಸ್ ಅಜ್ಜು ಆ ವಾತೆ ಭರಪೂರ್‌ಥಿ ಸ್ವೀಕಾರ್ ಕರಾನ ಅಜ್ಜು ವಿಶ್ವಾಸ್ ಕರಾನ ಯೋಗ್ಯ ಹುಯಿರುಸ್.

10 ಅಜ್ಜು ಹಮೆ ಕರಣ್‌ಧಿ ಖ್ವಮಾಳಿನ್ ವಾಖ್ಯೊ ಪಡುಕರ್ಯ್. ಹಮೆ ಹಮಾರ ಭರೋಖ್ವಾನ ಜಿವ್ತ ದೇವ್ ಉಪ್ಪರ್ ರಾಖಿಮ್ವೆಲ್ಯಸ್. ಯೋ ಅಖ್ವಾನ ಬಫಾಡವಾಳೊ ಅಜ್ಜು ಜಾಖ್ವತ್ ವಿಶ್ವಾಸ್ ಕರವಾಳನ ರಕ್ಷಕ್ ಹುಯಿರೋಸ್.

11 ಆ ಖ್ವಾರಿ ಬಾರೇಮ ಇವ್ವುನ ಹುಕುಮ್ ಕರ್ ಅಜ್ಜು ಶಿಕಾಡ್.

12 ತೂ ಜಾನ್ಲಮಾನ್ ಹುಯಿರೋಸ್ ಇನಖ್ವಾಜೆ ತುನ ಕೀಳ್‌ಧಿ ನಕೊ ದೇಖಾದೆ. ಕತೋಬಿ ವಿಶ್ವಾಸಿಖ್ವಾರನ ವಾತೆಚೀತೇಮ, ಚಾಲ್ ಭಲಣ್‌ಮ, ಪ್ಯಾರ್ ಅಜ್ಜು ವಿಶ್ವಾಸ್‌ನ ಪರಿಶುದ್ ಜೀವನ್‌ಧಿ ಮತಲಬ್ ಹುಯಿರ್ದೆ.

13 ಮೇ ಆವಾತೋಡಿ, ತೂ ಅಖ್ವಾನ ಖ್ವಾಪ್ಪೆ ವಚನ್ ಪಡಾಮ, ಬೋಲಿದ್ಯವಾಮ ಅಜ್ಜು ಶಿಕಾಡಾಮ ಹುಮ್ಮಖ್ವಾಧಿ ರ್ದೆ.

14 ತುನ ಮಳಿರ್ದೆತಿ ಕೃಪೆನ ಝಿಟ್ಕಾರ್ ನಕೊ, ಯೋ ವರ ಸಬೇನು ಘಲ್ವುಖ್ವಾರು ಪ್ರವಾದನೇನಿ ಜೋಡ್ತಾರಪರ್ ಹಾತ್ ಮ್ವೇಲಾಧಿ ಯೋ ತುನ ಮಳಿರ್ದೆ.

15 ಆ ವಾತೆವ್ತ ತೂ ಮಳಿರ್ದೆ ಅನೇಧಿ ಭಡಾನು ಅಖ್ವಾ ಅದ್ಮಿವ್‌ನ ಖ್ವಾಪ್ಪೆ ದೆಖಾವಾಶೆ.

16 ತಾರಿ ಜಿವ್ವು ಅಜ್ಜು ಬೋಧನೆಪರ್ ವಿಶೇಷ್‌ಧಿ ಖ್ವಿಯಾಲ್ ರಾಕ್. ಆ ಅಖ್ವಾನ ಕರ್ತೋಸ್ ರ್ದೆ, ಶನಕತೊ ತೂ ಕರ್ತೊ ರ್ದಿಯೋತೊ ಅನೇಧಿ ತೂ ತುನಾಸ್ ಅಜ್ಜು ಕೋಣ್ ಆ ವಾತ್ನ ಖ್ವಮ್‌ಜಾಸ್ಕಿ ಇವ್ವುನಾಬಿ ಬಫಾಡಿಶ್.

5

ವಿಶ್ವಾಸಿಯೇನ ಬಾರೇಮ ಜಿಮ್ಮೇದಾರಿ

1 ಬುಧಾ ಅದ್ಮಿನ ಗುರ್‌ಕಾವ್‌ನಕೋತೆ, ಇವ್ವುನ ತಾರ ಬಾನಿಮತ್ ಕರಿ ಸೋಚೊ, ಜಾನ್ಲಮಾನ್ ಪರ್ಖ್ವಾವ್‌ನ ಭೈಯೇನಿಫೋಣಿ ಇವ್ವುನ ಅಕ್ಕಲ್ ಬೋಲಿಒತಾಳ್.

2 ಬುಡಿಯಾ ಬಾಯ್ಕಾವ್‌ನ ಆಯಾನಿಮತ್ ಅಜ್ಜು ಜಾನ್‌ಮಾನ್ ತಯೇಡಾವ್‌ನ ಪಾಕ್‌ಮನ್‌ಧಿ ನ್ಹಾನಿ ಭೇನ್ ಮೋಟಿಭೇನೆನ್ನಿ ಮತ್ ದೇಕ್ಕು ಇವ್ವ ಜೋಡೆ ಪಾಕ್‌ಮನ್‌ಧಿ ಚಾಲಿಲೇವ್ವು.

3 ದಿಕ್‌ದೇಶಾರ್‌ಕೊಂತೆ ಮುಂಡಚ್ಚಿ ತಯೇಡಾವ್‌ನ ಖದ್ದರ್ ಕರೊ, ಶನಕತೊ ಇವ್ವುನ ಖ್ವಾಚಮಾಬಿ ಇನು ಜರೂರತ್ ಲ್ಹಾ.

4 ಕತೋಬಿ ಏಕ್ ಮುಂಡಚ್ಚಿನ ಲಡ್ಕಾ ನತರ್ ನಾತಿಪೋತಿ ರ್ಹಿಯೂತೊ, ಇವ್ವೆಸ್ ಪಹಿಲೆ ಭಕ್ತಿನ ಜಿವ್ವಮ ಚಾಲಿಲಿನ್, ಇನ ಘರ್‌ವಾಳಾನ ದೇಖಿಲ್ಯವಾನು ಶಿಕಿಲೇವ್ವು. ಇವ್ವುನ ಹೋಣುತೆ ಆಯ-ಬಾನ ಅಜ್ಜು ಇನ ಅಜ್ಜ ಅಜ್ಜಿನ ಚಾಕ್ರಿ ಕರಾವಾಳ ಹುಯಿರ್ಲ್ಹೇಣು ಆ ದೇವ್ವ ಪಸಂದ್‌ನು ಹುಯಿರುಸ್.

5 ಖ್ವಾಚಮಾಬಿ ದಿಕ್‌ದೇಶಾರ್ ಕೊಂತೆ ಏಕ್ ಮುಂಡಚ್ಚಿ ರ್ಹಿಯೀತೊ, ಯೋ ದೇವ್‌ಪರ್ ಇನೊ ಭರೋಖ್ವೊ ನಾಖಿನ್, ಇನಿ ಮದತ್ವಖ್ವಾಜೆ ದನ್-ರಾತ್ ದೇವ್ವ ಪ್ರಾರ್ಥನೆ ಕರಾವಾಳಿ ಹುಯಿರ್ಲ್ಹೇಣು.

6 ಕತೋಬಿ ಏಕ್ ಮುಂಡಚ್ಚಿ ಬಿಜ ಪರ್ವಾನ ಜೋಡ್ಡ ಇನಿ ಆಖ್ವೊನ ಪೂರ ಕರಾನ ಇನಿ ಜಿಂದ್‌ಗೀನ ದಿನಾಖಿದಿದೀತೊ, ಯೋ ಬಚಿರ್ಲ್ಹಿಯೀತೋಬಿ ಮರ್‌ವಾದಾಖ್ವಲಸ್.

7 ಇನಖ್ವಾಜೆ ವಿಶ್ವಾಸಿವೋನ ಹುಕುಮ್ ದೇ ಅನೇಧಿ ಕೋಣ್‌ಬಿ ಇವ್ವಾಪರ್ ಗಲತ್ ನಾ ಲಗಾಡ್‌ಣು.

8 ಕೋಣ್‌ತೋಬಿ ಇವ್ವ ಮಾಯ-ಮಾತ್ರಾನ, ಇವ್ವ ಘರ್‌ವಾಳಾವ್ವ ಖದ್ದರ್ ನಾ ಕರ್ಯೊತೊ, ಯೋ ಕ್ರಿಸ್ತಮಾನಿ ಇನು ವಿಶ್ವಾಸ್‌ನ ದಿದೊಹುಯೊ ಅಜ್ಜು ಯೊ ವಿಶ್ವಾಸ್‌ಕೊಂತೆ ಇವ್ವೆಥಿಬಿ ಕಡ್‌ತೆಲ್ ಹುಯಿರ್ಲ್ಹೋಸ್.

9 ತೀನಿಖ್ವೊ ವರಖ್ವೊಥಿ ಕಮ್ ಉಂಬರನ್ನಿ ಮುಂಡಚ್ಚಿಯೇನ, ಮುಂಡಚ್ಚಿಯೇನಿ ಪಟ್ಟಿಮ ನಕೊ ಮಳಾವ್. ಕತೋಬಿ ಯೋ ಖಲಿ ಏಕ್ ಬಾವಿನ ಬಾವಣ್ ಹುಯಿರ್ಲ್ಹಾವಳಿ,

10 ಅಜ್ಜು ಇನು ಗುಣ್ ಅಲ್ಪು ಕಾಮ್ ಕರಾಮಸ್ ರ್ಲ್ಹೇಣು. ಅಜ್ಜು ಇನ ಲಡ್ಕಾವ್ವ ಅಲ್ಪಿನಿತರ ಪಾಳಿರಾಕ್ಚು ಘರ್‌ಕನ ಆವವಾಳಾನ

ಸ್ವಾಗತ್ ಕರಾವಾಳಿ ಹುಯಿರ್ದೇಣು. ಬಿಜು ರ್ದೇಸ್ತೆ ವಿಶ್ವಾಸಿನಿ ಜೋಡ್ತ ಧೋಬೆಡಿನಿತ್ರ ಚಾಲಿಲೇವ್ಣು. ಖ್ವತಾಪ್ಪಿಮ ರ್ದೇಸ್ತೆ ಅದ್ವಿವಾನ್ ಮದತ್ ಕರಾವಾಳಿ ಹುಯಿರ್ದೇಣು. ಅಜು ಅಲ್ಫುಕಾಮ್ನ ಸಮರ್ಪಣ್ ಕರಿರಾವಾಳಿ ಹುಯಿರ್ದೇಣು.

11 ಕತೋಬಿ ಜಾನ್ಲಮಾನ್ ಮಂಡಚ್ಚಿಯೇನ ಆ ಪಟ್ಟಿಮ ನಕೊ ಮಳ್ಳೆಶ್; ಶನಕತೊ ಇವ್ಣುನ ಪಾಳ್ತು ವ್ಯಹಾ ಕರ್ನ್ ಕರಿ ಆಖ್ಲೆಐಗಿತೊ, ಕ್ರಿಸ್ತಮ ರ್ದೇಸ್ತೆ ಭಕ್ತಿಧಿ ಮ್ಹೇಲಿದೇಸ್.

12 ಎಥ್ರಾನವಾಳೊ ಇವ್ಣೆ ಪಹಿಲೆ ಕರ್ರೊತೆ ವಾಗ್ದಾನ್ ಮ್ಹೇಲಿದಿನ್ ನ್ಯಾಯತೀರ್ಪಾಮ ಪಡಿಭಾಸ್.

13 ಎತ್ರೇಸ್ ಕಾಹತೆ ಇವ್ಣೆ ಘರ್-ಘರ್ ಫರ್ತಿಹುಯಿನ್ ಇನಿ ವಖ್ವತ್‌ನ ಬರ್ಬಾತ್‌ಕರಾಸ್, ಅನೇಥಿಬಿ ಜಾಖ್ವತ್ ಮಶ್ಲ ಮಾರಾನು ಅಜು ಬಿಜಾನ ಕಾಮ್ ಗೋಡೊಫಾಲಾನು ಕರಸ್.

14 ಇನಖ್ವಾಜೇಸ್ ಮೇ ಬೋಲುಸ್ಕಿ, ಜಾನ್ಲಮಾನ್ ಮುಂಡಚ್ಚಿಯೆ ವ್ಯಹಾ ಕರಿಲೇನ್, ಲಡ್ಕಾ ಜಣಾದೆ ಅಜು ಇವ್ಣೆ ಘರ್‌ನ ದೇಕ್-ಭಾಲ್ ಕರಾದೆ, ಅನೇಥಿ ಅಪ್ಪದುಶ್‌ಮನ್ನ ಅಪ್ಪಪರ್ ಗಲತ್ ಬೋಲಾನ ವಾಟ್ ಕೋ ರ್ದೇಶೇನಿ.

15 ಕತೋಬಿ ಥೋಡಿ ಮುಂಡಚ್ಚಿಯೆ ತಯೇಡ ತದ್ದೇಸ್ ಇವ್ಣಿ ವಾಟ್ನ ಮ್ಹೆಂದಿನ್, ಶೈತಾನ್ ಪೀರೆ ಚಲಿಗೈಯೆ.

16 ಕತೋಬಿ ಏಕ್ ವಖ್ವತ್ ವಿಶ್ವಾಸಿ ತಯೇಡಾವಾನ್ ಘರ್‌ಮ ಮುಂಡಚ್ಚಿಯೆ ರ್ದೆಯೇತೊ, ಇವ್ಣೆಸ್ ಇನಿ ಖದರ್ ಕರ್ನ್, ಅಜು ಯೊ ವಜನ್ನ ಸಬೇಪರ್ ನಾ ನಾಕ್ಟು. ತದೆ ದಿಕ್-ದೆಶಾರ್ ಕೊಂತೆ ಇವ್ಣುನ ಸಬೆ ದೇಕ್‌ಭಾಲ್ ಕರಿಜಾಯ್.

17 ಸಬೇಮ ಅಲ್ಫಿನಿತರ ಕಾಮ್ ಕರಾಸ್ತೆ ಶಾಣ ಅದ್ವಿನ ಬೇ ಪಟ್ ಮರ್ಯಾದಿ ದೇವ್ಣು. ತದೆ ವಚನ್ ಬೋಲಿದ್ಯವಾಮ ಅಜು ಶಿಕಾಡಾಮ ಯೊ ಮ್ಹಿನತ್ ಕರಾಸ್.

18 ಧರ್ಮಶಾಸ್ತ್ರ ಬೋಲಾಸ್ಕಿ “ಖಳು ಮುಂದ್ಲಾತೆ ಡಾಂಡನ ಮ್ಹೋಡಾನ ಮ್ಹೋರ್ಕಿ ನಾಫಾಲ್ನು” ಕರೀಬಿ “ಅಜು ಕಾಮ್ ಕರಾವಾಳೆ

ಆಳನ್ ಬರೋಬರಾನಿ ಕೂಲಿ ದೇವ್ಣ್ ಕರೀಬಿ ವಚನ್‌ಮ ಬೋಲಾಸ್.

19 ಸಭೆನ ಶಾಣಾವಾಪರ್ ಕೋಣ್‌ತೋಬಿ ಗಲತ್ ಬೋಲ್ಯೊತೊ, ಬೇ ನತರ್‌ಕಿ ತೀನ್ ಅದ್ವಿನ ಮ್ಹೋಡೇಥಿ ಸಾಕ್ಷಿ ನಾಬೋಲ್ಯೊತೊ, ಇನ ನಂಬಿಶ್ ನಕೊ.

20 ಪಾಪ್ ಕರಾವಾಳನ ಖ್ಹಾರಾನ ಖ್ಹಾಮ್ಲೆಸ್ ಗುರ್‌ಕಾವ್, ಅನೇಥಿ ಬಿಜು ಅದ್ವಿಖ್ಹಾರುಬಿ ಡರ್‌ಶೆ.

21 ತೊ ಬೋಲಿ ಖ್ಹಮ್‌ಜಾನ ಅಗಾಡಿಸ್ ಗಲತ್ ನಾಲಗಾಡ್ತುತೇಬಿ, ಏಕಾಬಾಜುಸ್ ಶಾತ್ರಿ ನಾಕರ್‌ತುತೇಬಿ, ಮೇ ಬೋಲ್ಯೊತೆ ತಿಮ್ ಚಾಲ್ತುಕರಿ ದೇವ್ ಖ್ಹಾಮ್ಲೆಬಿ ಅಜು ಕ್ರಿಸ್ತಯೇಸು ಖ್ಹಾಮ್ಲೆಬಿ, ಚೂಣೈರ್‌ತುತೆ ಪರಿಶುದ್ ದೂತರ್‌ನ ಖ್ಹಾಮ್ಲೆಬಿ ಮೇ ತುನ ಖ್ಹಾಚಾಥಿ ಬೋಲುಕರುಸ್. ಖಿವೂಬಿ ಅಜು ಖ್ಹಾಚಿ ಪರ್ಖಾನ ಅಗಾಡಿ ಕಿನಭಣಿಥೂಬಿ ನಾ ರ್ಲೆವ್ಣುತೆ ಆ ಖ್ಹಾರು ಕಾಮ್ ಕರ್‌ನ್.

22 ಉತ್ವಾಳಿಥಿ ಕಿನ ಮಾಥಪರ್‌ಬಿ ಹಾತ್ ಮ್ಹೇಲಿನ್, ಪ್ರಭುನಿ ಸೇವೇನ ನೇಮಕ್ ನಕೊ ಕರೀಶ್. ಇಮ್ ನೇಮಕ್ ಕರ್‌ಚೊತೊ ಇವ್ಣ ಪಾಪ್‌ಮ ತೂಬಿ ಭಾಗ್‌ವಾಳೊ ಹುಯಿಜ್ಜೆಶ್. ತಾರು ತೊ ಪಾಕ್‌ಥಿ ರ್ಲೆವಾನಿಘೋಣಿ ದೇಖಿಲೆ.

23 ಪಾಣಿಸ್ ಖಾಲಿ ಪೀನಕೊ, ತುನ ಅಲ್ಪಿನಿತರ ಹಜಮ್ ಹುವಾನಖ್ಹಾಜೆ, ಥೋಡು ಥೋಡು ದ್ರಾಕ್ಷಿನು ರಖ್‌ಬಿ ಪೀ. ಶನಕತೊ ಅಜು ತೊ ಘಡಿ-ಘಡಿ ರೋಗ್‌ಮ ಪಡೀಜಾಸ್.

24 ಥೋಡ ಅದ್ವಿನು ಪಾಪ್‌ಖ್ಹಾರು ಅಲ್ಪಿನಿತರ ದೆಖಾವಸ್ ಅಜು ಯೋ ಪಾಪ್ ಇವ್ಣುನ ನ್ಯಾವ್‌ನಿ ತೀರ್ಮಾನಕನ ಲೀಜಾಸ್; ಕತೋಬಿ ಅಜು ಥೋಡು ಅದ್ವಿನು ಪಾಪ್ ಖ್ಹಾರು ಲಪೈರ್‌ಲಿನ್ ಅಜು ದೆಖಾವಾನ ಥೇರ್ ಲಾಗಸ್.

25 ಇಮ್ಮಸ್ ಅಲ್ಪು ಕಾಮ್‌ಖ್ಹಾರುಬಿ ಅಲ್ಪಿನಿತರ ದೆಖಾವಸ್, ಕತೋಬಿ ಖಿವು ದೆಖಾವಕೊಯ್ಣಿ ಇನಾಬಿ ಲಪಾಡಿರಾಖನ ಕೊಹುವ್ಪಾನಿ.

6

1 ಗುಲಾಮ್‌ನ ನೊಗಾಮ ಖ್ಹಪ್‌ಡಿರ್‌ವಾಳು ಇವ್ಣ ಯಜಮಾನ್ನ್

ಬರಾಬರ್‌ಥಿ ಮರ್ಯಾದಿ ದೇವ್ವು, ಅನೇಥಿ ದೇವ್‌ನು ನಾಮ್ ಅಜ್ಜು ಅಪ್ಪೆ ಬೋಲಿದಿಯೇತೆ ವಚನ್ನಿ ವಿರೋದ್ ಕೋಣ್‌ಬಿ ಗಲತ್ ಬೋಲಾನ ಕೋ ಉಶೇನಿ.

² ಅಜ್ಜು ಅಮ್ಮ ಸೇವಕ್‌ನ ಇನೊ ಯಜಮಾನ್ ವಿಶ್ವಾಸಿ ಹುಯಿರೋಸ್. ಇವ್ವಿಬಾರೇಮ ಕಮ್ ಮರ್ಯಾದಿಥಿ ನಾ ದೇಕ್ಕು ಇವ್ವೆ ವಿಶ್ವಾಸ್ಮ ಬೈಯೇ ಹುಯಿರಾಸ್. ಇವ್ವೆ ಇವ್ವ ಯಜಮಾನ್ನಿ ಬಾರೇಮ ಬಿಜೂಬಿ ಜಾಖತ್ ಸೇವೆ. ಶನಕತೊ ಅನೊ ನಫೊ ಕಿನ ಮಳನ್ನಿ ಇವ್ವೆ ವಿಶ್ವಾಸಿ ಹುಯಿರುಸ್. ಅನೇಥಿ ಇವ್ವೆ ಪ್ಯಾರ್ ಕರ್ಶೆ, ಆ ಖಾರಿವಾತೆನ ಶಿಕಾಡೀನ್ ಬೋಲಿವತಾಳ್.

ಝೂಟಿ ಬೋಧನೆ ಅಜ್ಜು ಖಾಚಿ ಶೊತ್ತಿ ಬಾರೇಮ

³ ಏಕ್ ವೇಳ್ ಕೋಣ್‌ತೋಬಿ ಬಿಜಿಥರಾನು ಉಪದೇಶ್‌ನ ಶಿಕಾಡನ್ನಿ ಅಜ್ಜು ಅಪ್ಪೊ ಪ್ರಭು ಯೇಸುಕ್ರಿಸ್ತನಿ ಖಾಚಿ ವಚನ್ ಅಖ್ವಾನ ಅಜ್ಜು ಭಕ್ತಿಥಿ ರ್ವಾವಾನು ಭರ್‌ಪೂರ್ ಬೋಧನೆನ ಕೋಣ್ ಸ್ವೀಕಾರ್ ಕೋ ಕರಿಲೇಯ್ಕಿ,

⁴ ಯೋ ಹಂಕಾರ್‌ಥಿ ಭರ್ತೆರ್ವಾವಾಳೊ ಹುಯಿರೋಸ್. ಅಜ್ಜು ಇನ ಶಾಶ್ವಿ ಮಾಲುಮ್ ಕೊ ರ್ವೇಯ್ಕಿ. ಇನುಕೊಂತೆ ಆಖ್ವಾನಿ ಕಾರಣ್‌ಥಿ, ಅಬ್ಬಾಜಬ್ಬಿ ಕರಾಸ್ ಅಜ್ಜು ಇನಿ ಖರಾಬ್ ವಾತೆಥಿ ಲಡೈಕರಸ್ ಅನೇಥಿ ಬಳಾಪೊ ಅಲಕ್ ಅಲಕ್‌ಹುಯಿನ್ ಲಡೈ-ಝುಗ್‌ಡೊ, ಚಾವ್‌ಣ್ಯ ಅಜ್ಜು ಖರಾಬ್ ಗಾಳೆ ಶುರುಕರಿಲೇಸ್.

⁵ ಅತ್ರೇಸ್ ಕಾಹೆತೆ ಇಮ್ಮ ಖಾರ್ ಅದ್ವಿಥಿ ಕದೇಬಿ ಖತಮ್ ಹುವ್ವಾಕೊಂತೆ ವಾದ್‌ವಿವಾದ್ ಪೈದಾ ಹುವಾಸ್. ಯೋ ಅದ್ವಿಖಾರು ಖಾಚಿನ ಧಕೇಲಿದಿಹುಯು ಹುಯಿರ್ವ್ವಾಸ್. ದೇವ್ನಿ ಸೇವೆ ಕತೊ ಧನ್-ದಾಲತ್ ಕಮಾವಾನೊ ಮಾರಗ್ ಕರಿ ಇವ್ವೆ ಸೋಚ್‌.

⁶ ದೇವ್ನಿ ಸೇವೆ ಕರಾವಾಳೊ ಇನಾಕನ ಛಾತೆ ಇನಾಮ ಲ್ಲಾಯಕ್‌ರ್ವ್ವೋತೊ, ಯೋ ಮೋಟೊ ಶೌಕಾರಸ್.

⁷ ಅಪ್ಪೆ ಜಗತ್‌ಮ ಆವಾನಿವಖ್ತೆ ಶಾಶ್ವಿ ಪಾಡಿಲಿನ್ ಕೋಆಯಾನಿ ಅಪ್ಪೆ ಜಗತ್ ಮೈಲಿಜಾವಾನಿ ವಖ್ತತ್‌ಮ ಶಾಶ್ವಿ ಲೀಜಾಶು ಕೊಯ್ಕಿ.

⁸ ಇನಖ್ವಾಜೇಸ್ ಅಪ್ಪುನ ಖಾಣು ಅಜ್ಜು ಲುಂಗ್ಡ ರ್ವಯೊತೊ ಬಶ್.

9 ಕತೋಬಿ ಶೌಕಾರ್ ಹೋಣುಕರಿ ಆಖ್ವಾಕರಾವಾಳು ಇವ್ವು ಇವ್ವೇಸ್ ಶೋದನೆಮ ಪಡಾಸ್ ಅಜ್ಜು ಕೈಯೆಕ್ಕಿ ಖರಾಬ್ ಅಜ್ಜು ಖತರ್‌ನಾಕ್ ಆಖ್ವಾನ್ ಫಾಖ್ವಾಮ ಖ್ವಿಪ್‌ಡಿಙ್ಗಾಸ್, ಅನೇಥಿ ಇವ್ವೆ ಬಿಗ್‌ಡಿಙ್ಗಾಸ್ ಅಜ್ಜು ಬರ್ಬಾತ್ ಹುಯಿಙ್ಗಾಸ್.

10 ಪೈಶಾನಿಪ್ಪಾರ್ ಖ್ವಾರಿಸ್ ತರ್ರಾನ್ರು ಖರಾಬ್ ಫನ್ನೆನು ಜಡ್‌ನ ಶುರುವಾತ್ ಹುಯಿರ್ರ್ವಾಸ್. ಥೋಡುಜ್ಜಣು ಅನ ಕಮಾವಾನಿ ಆಖ್ವಾಧಿ ಕ್ರಿಸ್ತಮಾನಿ ವಿಶ್ವಾಸ್‌ನ ಮ್ಹೇಲಿನ್, ಕೈಯೆಕ್ಕಿ ಖ್ವಿತಾಪ್ಪಿಧಿ ಇವ್ವ ದಿಲ್ವ ಭೋಕಿಲೇಸ್.

ಇನಿಸ್ ಸೋಚ್ ಸಮಾಚಾರ್

11 ಕತೋಬಿ ದೇವ್‌ನು ಅದ್ವಿ ಹುಯಿರ್ರ್ವೊತೆ ತೂತೊ, ಆ ಖ್ವಾರೇಥಿ ದೂರ್ ರ್ವೊ. ನೀತಿಮ, ಭಕ್ತಿಮ, ವಿಶ್ವಾಸ್‌ಮ, ಪ್ಯಾರ್‌ಮ, ಖ್ವಮಾಳಾಮ ಅಜ್ಜು ಭಾಲ್‌ಚಲಣ್‌ಮ ಅಫ್ಲೊ ರ್ವ್ವಾನಟೇಕೆ ಅಖ್ವಾ ಮನ್‌ಥಿ ಕೋಶಿಶ್ ಕರ್.

12 ವಿಶ್ವಾಸ್‌ನಿ ಹರ್‌ಜಿತ್‌ಮ ತುನ ಹುವಾಯಿತ್ರೆ ಅಫ್ಲಿನಿತರ ಮಿಲೈನ್, ತಾರಖ್ವಾಜೆ ಹಮೇಶಾನಿ ಙ್ಗಿಂದ್‌ಗೀನ ಜೂತಿಲೆ. ತುನ ಅನಖ್ವಾಜೆಸ್ ದೇವ್ ಬುಲಾಯೋತೆ, ಅಜ್ಜು ಕೈಯೆಕ್ಕಿ ಸಾಕ್ಷಿನ ಖ್ವಾಮೆ ತುನೆ ಶಪತ್ ಲೀರಾಖ್ವೋಸ್.

13 ದೇವ್ ಖ್ವಾಮೆ ತಮಾಮ್‌ನ ಜಾನ್‌ಹುಯಿನ್ ರ್ವ್ವಾಳೊ ಹುಯಿರ್ರ್ವೊಸ್ ಅಜ್ಜು ಕ್ರಿಸ್ತ ಯೇಸುನ ಖ್ವಾಮ್ವೆ ಮೇ ತುನ ಹುಕುಮ್ ದೆವುಸ್. ಪೊಂತ್ಯ ಪಿಲಾತನ ಖ್ವಾಮೆ ಭಾಲ್‌ಥಿ ಸಾಕ್ಷಿ ದಿದೋತೆ ಯೋ ಶಾತ್‌ಕತೊ,

14 ಅಪ್ಪೊ ಪ್ರಭು ಹುಯಿರ್ರ್ವೊತೆ ಯೇಸು ಕ್ರಿಸ್ತ ದೆಖಾವತೋಡಿ, ತೂ ಯೋ ಹುಕುಮ್‌ನ ಮೈಲಾಪ್ ಕೊಯ್ತೇಬಿ ಚಿಂಫಾವ್ವಿ ಕೊಯ್ತೇಬಿ ಜತನ್ ಕರಿಲೇವ್ವು.

15 ದೇವ್‌ಥಿ ಇನಿ ಬರಾಬರ್‌ನಿ ವಖ್ವತ್‌ಮ ಇನ ದೇಖಾವನಿತ್ರೆ ಕರ್ಶೆ. ಯೋ ಧನ್ಯ ಅಜ್ಜು ಎಕ್ವಸ್‌ಜ್ಜಣೊ ಹಕ್ ಚಲಾವವಾಳೊ, ರಾಭಾನೊ ರಾಜಾಬಿ, ಪ್ರಭುನೊ ಪ್ರಭುಬಿ ಹುಯಿರ್ರ್ವೊಸ್.

16 ಇನ ಎಕ್ಕಸ್ ಜಞಾನ ಮರಣಕೊಂತೆ. ಕೋಣ್‌ಬಿ ಖನ್ನೆ ಜಾವಾನ ಕೋ ಹುವ್ವಾನಿತೆ ಉಜಾಳಾಮ ರ್ವಾವಾಳೊ ಹುಯಿರರ್ವ್ವೊಸ್; ಹಂಕೆತೋಡಿ ಕೋಣ್‌ಬಿ ಇನ ದೇಖಿರಾಖ್ಯುಕೊಯ್ತೆ; ದೇಖಾನ ಉಶೇಬಿ ಕೊಯ್ತೆ ಇನು ಇಜ್ಜತ್ ಅಜು ಮಟಾನುಕೊಂತೆ ಶಕತ್ ಕೆದೇಬಿ ಇನಾಸ್ ರ್ವಾವಾದೆ! ಆಮೆನ್.

17 ಆ ಜಗತ್‌ಮ ಶೌಕಾರ್ ಹುಯಿರರ್ವ್ವಾಳನ ಹುಕುಮ್ ದೇಕಿ, ಇವ್ಣೆ ಹಂಕಾರ್ ನಾ ಕರ್ನ್ ಕರಿ, ಅಜು ಇವ್ಣಿ ಧನ್-ದೌಲತ್‌ಪರ್ ಭರೋಖ್ವೊ ನಾರಾಕ್ಲತೆ, ದೇವ್‌ಪರ್ ಭರೋಖ್ವೊ ನಾಖಾದೆ ಕರಿ, ಯೋ ಅಪ್ಪೆ ಹಕ್ಲಾಲ್‌ಧಿ ರ್ವಾವಾನಟೇಕೆ ಖ್ವಾರುಸ್ ದೈವಾಳೊ ಹುಯಿರರ್ವ್ವೊಸ್.

18 ಇವ್ಣುನ ಹುಕುಮ್ ದೇಕಿ; ಇವ್ಣೆ ಅಲ್ಟು ಕಾಮ್ ಕರ್ನ್. ಅಜು ಅಲ್ಟು ಕಾಮ್ ಕರಾಮ ಇವ್ಣೆ ಶೌಕಾರಿ ಹುಯಿರರ್ವ್ವೊಣು, ಧರ್ಮಿ, ಅಜು ಇವ್ಣಾಕನ ಛಾತೆ ಜಿನಖ್ವೊನ ವಾಟಪಾಡಿಲ್ವಾವಾದೆ.

19 ಅನೇಧಿ ಇವ್ಣೆ ಜಿವ್ಣು ಧರಿರಾಕ್‌ಶೆ ಯೋ ಖ್ವಾಚನು ಜಿವ್ಣು ಹುಯಿರುಸ್. ಅಮ್ ಕರ್ನ್ಯೊತೊ, ಇವ್ಣೆ ಇವ್ಣಾಜೆ ಏಕ್ ಟಿಬ್ರೀನ ಜಮ ಕರಾದಾಖ್ವೊಲ್, ಯೋ ಇವ್ಣಿ ಖ್ವಾಪ್ಣೇನಿ ಜಿಂಧಗೀನಖ್ವಾಜೆ ಏಕ್ ಘಟ್ ಹದಿಪಾಯ ಹುಯಿರರ್ವ್ವೊಶೆ.

20 ತಿಮೊಥೆ, ತುನ ಶಾತ್ ದೀರಾಖ್ಯೊಸ್ತೆ ಇನ ಜತನ್‌ಧಿ ರಾಕ್, ಅಜು ಹೋಣುಕೊಂತೆ ವಾತೇಧಿ ಥೋಡುಜುಣು ಗಲತ್‌ಧಿ ಅಕ್ಕ್ಲ್ ಬೋಲಾಸ್ತೆ ಫಾಲ್ತು ವಾತೇಧಿ ದೂರ್ ರ್ವೊ.

21 ಥೋಡು ಅದ್ಮಿ ಯೋ ಝೂಟಿ ಗ್ಯಾನ್ನ ನಂಬಿನ್, ಇವ್ಣೆ ವಿಶ್ವಾಸ್‌ನ ಮ್ಹೊಂದಿದು. ದೇವ್ನಿ ವಾರ್‌ಖ್ವೊ ತುಮಾರ ಖ್ವಾರಸ್ಸು ಬೋಡ್ಡು ರ್ವಾವಾದೆ.

ದೇವ್ವಿ ಖಾಜಿ ವಚನ್
The New Testament in the Vaagri Booli language of
India: ದೇವ್ವಿ ಖಾಜಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ವಿ ಖಾಜಿ ವಚನ್
ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06